



Sud Bosne i Hercegovine
Суд Босне и Херцеговине

Broj: S1 3 Iž 043532 22 Iž
Sarajevo, 11.08.2022. godine

Sud Bosne i Hercegovine, u vijeću Apelacionog odijeljenja sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i Mirka Božovića, kao članova vijeća, odlučujući o žalbi Nermine Kapetanović, ..., Š., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine, u nejavnoj sjednici, održanoj dana 11.08.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što nedostaje prijavni obrazac, kao i dokaz o tačnoj adresi u inostranstvu.

Žaliteljica je protiv navedene odluke blagovremeno izjavila žalbu navodeći da ima privremeno boravište u Ženevi od 23.11.2018. godine kao ambasadorica BiH u UN u Ženevi. Ističe da nije bila u mogućnosti da dostavi dokaz o adresi boravišta, obzirom da se ambasadoru ne izdaje dokument potvrde o mjestu stanovanja. Napominje da je prijavni obrazac s punim podacima dostavila u ranijoj prijavi, te u prilogu žalbe dostavlja skenirani dokument ugovora u stanu u kome je navedena adresa.

Centralna izborna komisija Bosne i Hercegovine je dostavila ovom sudu odgovor na žalbu u kojem predlaže da se izjavljena žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave Nermine Kapetanović za glasanje izvan BiH dostavljene dana 19.07.2022. godine, pravilno uočila da u skladu sa Uputstvom o postupku slanja, prijema, obrade, arhiviranja i zaštite elektronskih prijava državljana BiH za glasanje izvan BiH elektronskim putem („Službeni glasnik BiH“ broj:27/22) podnositeljica žalbe nije uopće priložila prijavni obrazac za glasanje izvan BiH-Opći izbori 2022. godine.

Takođe je utvrđeno da podnositeljica prijave nije dostavila validan dokaz o tačnoj adresi u inostranstvu, odnosno dokaz koji bi potvrdio da su ispunjeni uslovi da se u smislu člana 3.15 stav 6. Izbornog zakona BiH nađe na izvodu iz Centralnog biračkog spiska za glasanje van BiH.

Postupajući na način opisan u prednje utvrđenom činjeničnom stanju, podnositeljica žalbe je postupila suprotno odredbi člana 3.15 stav (2) Izbornog zakona BiH („Službeni glasnik BiH“, broj 23/01 do 51/22), kojom je propisano da državljani BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Centralna izborna komisija BiH je u skladu sa članom 3.15 stav 1. Izbornog zakona BiH odredila rok do 19.07.2022. godine u 24,00 sata za prijem prijave za upis u birača u izvod iz Centralnog biračkog spiska za glasanje izvan BiH za Opće izbore 2022. godine. Žaliteljica je imala mogućnost da putem internet stranice i info linije Centralne izborne komisije BiH se informiše o statusu njene prijave koju je poslala 19.07.2020. godine i na taj način otkloni nedostatak koji se ogleda u činjenici da uopće nije dostavila obrazac prijave.

Osim toga, žaliteljica je propustila da otkloni nedostatke u ostavljenom roku od dva dana ni nakon poslani obavijesti putem e-maila.

Napomene radi, žaliteljici nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Zvezdana Antonović